

Awe Corte Superior ta dicta sentencia

19 LUNA DI PRISON EXIGI PA 2.5 KILO DI COCAINA

ORANJESTAD(AAN) -- Procurador General mr. Rosingh ta haya cu e castigo cu Juez den Corte di Promer Instancia a duna e muher Yugoslavo Dragica Stenczel esta 19 luna di prison pa purba exporta 2500 gram di cocaina, na su lugar.

Ayera mainta Corte Superior a trata e caso cu Dragica Stenczel a apela. Ta asina cu dia 31 di Juli 1998 Corte den Promer Instancia a conden'e na 19 luna di prison y el a apela e caso pasobra e ta haya cu e castigo ta mucho halto.

E tres Jueznan di Corte Superior a trata e caso caminda a repasa practicamente tur cos y a haci Dragica diferente pregunta. Mester a haci uso di

un traductor cu ta domina idioma Aleman ya cu Dragica ta biba na Alemania.

Dia 2 di April 1998, miembran di Douane a detene Dragica despues di a haya 2500 gram di cocaina scondi den su maleta. E droga tabata scondi den un bom falso.

Dragica a bisa e tres Jueznan cu na Alemania el a worde obliga pa traficantenan Colombiano pa bin busca e droga. Ta asina cu su ex casa a cay cera na Alemania cu un lote di cocaina cu aparentemente el a cumpra for di un grupo di Colombiano pero no a paga nan. E grupo aki a menaza Dragica cu e mester paga. Door cu Dragica no tin placa, nan a bis'e cu si e no bay busca droga pa nan na



Aruba, nan lo tuma represaya riba su dos yiunan muher. Tabata palabra caba cu na Aruba e lo haya un maleta den cual e droga ta scondi.

Presidente di Corte Superior a bisa Dragica cu na Aruba tin hopi hende cera pa droga y cada un ta bin cu un storia. Corte Superior no ta kere e storia di Dragica. Corte Superior ta kere cu Dragica a bin busca droga. E presidente di Corte Superior a remarca cu si di berdad el a worde menaza pa Colombianonan, pakico e no a acudi na autori-

dad na Alemania of aki na Aruba mes.

Procurador General mr. Rosingh a bisa cu e caso aki ta tradicional caminda a usa un maleta cu bom falso. E ta kere cu Dragica por a bay Polis na Alemania of aki mes y denuncia loke tabata pasando entre otro cu el a worde forza. Pero door di no haci esey, e ta responsabel pa transporta 2500 gram di cocaina. El a pidi Corte Superior pa confirma e sentencia di Corte den Promer Instancia.

Abogado Flanders a bisa Corte Superior cu no por kita afo cu Dragica a transporta droga. Sinembargo e ta kere cu mester tene cuenta cu circunstancianan bao di cual esaki a sosode.

El a muestra cu presidente di Corte Superior a remarca cu acusadonan di transportacion di droga cada vez ta bin cu un storia. Flanders a splica Corte Superior, cu e motibo cu Dragica no a bay Polis ta simplemente pasobra e sa cu si e haci esey, el a firma automaticamente su sentencia di morto. Ta door cu su ex casa a busca droga y no a paga esnan cu a dun'e, nan a bay

menaza Dragica.

Flanders ta kere cu por bien ta cu loke Dragica ta conta ta berdad pero e problema ta pa prueba cu esaki ta berdad.

El a bisa Corte Superior cu Dragica ta un persona hopi depresivo y actualmente ta bao tratamiento di psychiatrist. El a muestra cu Dragica, door di ta cera y ta sufrir di depresion, a perde hopi peso.

Flanders tambe a duna Corte Superior un documento cu Dragica a haya di Alemania caminda autoridadnan ta

menaza di kita su yiu y hinke den un institucion. Segun Flanders, e motibo cu Dragica no a pidi pa mand'e su pais ta pasobra tin indicacion cu ora e yega Alemania pa caba di sinta su castigo e lo por haya mas castigo acerca.

Flanders ta kere cu mester tene cuenta cu salud di Dragica y pa tin clemencia cune. El a pidi Corte Superior pa duna Dragica un castigo di tal forma cu mas pronto posibel e lo regresa Alemania pa e o perde derecho riba su yiu.

Corte Superior a cera tratameto di e caso y awe mainta ta dicta sentencia.

RENE HERDE TA BAY FOR DI GOBIERNO

ORANJESTAD(AAN) -- Pa basta tempo caba e rumornan tabata circula cu e vocero di gobierno, Rene (Baba) Herd , lo bay for di gobierno. DIARIO a combersa na diferente ocasion cu se or Herd , kende a expresa cu e ta pensando. Recientemente el a duna di conoce cu e tin pensa di bay traha den ense anza caminda e lo por duna un gran aporte den e restructuraci n.

Finalmente a keda confirma pa Promer Minister Eman cu entrante Januari 1999, Rene Herd , lo bandona gobierno. Promer cu e bandona gobierno, Herd  lo bay disfruta di su simannan di vacacion bon mereci.

E pregunta grandi ta, ken lo bay reemplaza Rene Herd , kende den un periodo di cuater a a a sa di crea un bon relacion cu prensa.

Rene Herd  ta un persona hopi respeta den medionan di comunicaci n caminda a crea un relacion hopi cera cune. Ki ora cu ta, Herd  ta disponibel y ta masha dif cil pa bo tende Herd  bisa cu e no por yuda. Semper e ta disponibel. Te den oranan laat di anochi ainda Herd  ta pendiente di e ultimo detayes cu ta pasa den gobierno pa asina mantene prensa debidamente informacion.

E parti di aprecia di Herd  ta, apesar cu e ta forma parti di gobierno, e ta habri pa tuma cualkier critica caminda e ta sinta scucha e persona completamente y despues ta intercambia di idea. Ta di spera cu gobierno lo por haya un persona cu e mesun inteligencia,

capacidad y disponibilidad cu Rene Herd .

Di parti di redaccion di DIARIO, nos kier bisa Rene Herd  danki pa e cooperacion cu semper e tabata sa di duna y ta desee hopi exito den su trabao nobo.

MARY X-MAS!!

